



INTRODUCZIUN

DA SORA MARIA VINCENZ

Denter «hosanna» e «vid la crusch cun el»!

Cun palmas, vestgius rasai ora sin via, giubel e cloms da hosanna vegnin nus oz confruntai els texts biblics.

Ed il medem temps meditein nus la passiu da Jesus, siu pitir profund e sia mort brutala. Omisdu – legria e pitir – saudan ella veta da Jesus.

Mo tras tutta stgiradetgna dil pitir e murir da Jesus resplenda gia oz la glisch e la speranza dalla levada. Pitir e murir han buca il davos plaid.

Omisdu – legria e pitir – saudan era en nosa veta. La liturgia dalla dumengia da palmas envida en nus d'accumpagnar Jesus naven da Betfage e Betania, naven digl iert dallas ulivas viers Jerusalem, naven da Jerusalem sil Golgota, naven dalla fossa alla levada. Lein ir quella via, savend e cartend che quella ei era nosa via, sin la quala Jesus accumpogna era nus.

EVANGELI

Mc 11,1–10

¹Sin viadi viers Jerusalem ein ei vegni a Betfage e Betania, damaneivel dil Cuolm dallas ulivas. Leu ha Jesus tarmess dus da ses giuvnals ²e detg ad els: Mei el vitg davon vus. Immediat cu vus entreis el vitg, anfleis vus leu in pulein rentaus. Sin quel ei aunc negin sesius. Disrentei el e vegni cun el. ³E sch'enzatgi di a vus: Tgei fageis cheu? – sche rispunde: Il Segner drova el, mo vegn beingleiti a turnar el. ⁴Els ein i ed han anflau in pulein rentaus sper ina porta ordaviert sin via. Ed ei han fatg liber el.

⁵Zacons da quels che stevan leu han dumandau els: Tgei veis vus da far liber quei pulein? ⁶Els han rispundiu sco Jesus veva detg ad els, ed ins ha schau cumbien els. ⁷Ei han menau il pulein tier Jesus, han fiers lur mantials sin el, e Jesus ei sesius sin el. ⁸Biars sternevan lur vestgadira sin via, auters in pugn plein verd ch'ei sdrappavan sil funs. ⁹E quels che mavan ordavon e quels che suandavan, grevan:

Hosanna!

Benedius sei quel che vegn en num dil Segner!

¹⁰Benedius il reginavel che vegn,

il reginavel da nies bab David!

Hosanna ellas altezias!

¹¹Ei ei entraus el marcau da Jerusalem, el tempel. Havend contemplau tut, eis el ius culs dudisch a Betania, pertgei ei fuva gia tard.